

పాలు పిలిప్పీయులుకు రాసిన పత్రిక పాలు పిలిప్పీయులుకు రాసిన పత్రిక అగరో కొత

ఎ పిలిప్పీ పత్రిక ఇంచుమించు క్రీస్తు జొరైలా 61 బొచ్చురోనె తరవాత పిలిప్పీరె రొల్ల విస్వాసులుకు రాసిలీసి పాలు రొమా పట్నంరె చెరసాలరె రొల్లాబెల్లె రాసికిరి అచ్చి 1:13 బులి కొయిమి ఎ ఉత్తరము పిలిప్పీ పట్నంరె రొల్ల సంగముకు రాసిబొడిసి పిలిప్పీ గురించి అమె అపొస్తలు పుస్తకాలరె చదివించుచొ ఎ పిలిప్పీ పట్నం మాసిదొనియ దెసాకు రాజదాని పట్నంవన అచ్చి ఎ పిలిప్పీ సంగమాక మాసిదొనియరె అగుంతా బందిల సంగం యే సంగం పాలు సీల దీకిరి బందిపించిలబెల్లె గుటె సారి రత్తి అంకు చెరసాలరె రొయిదీసె అపొస్తలు 16 అద్యాయం.

ఎ లేక రాసిల పాలు బడే ఉద్దేసము సంగరె రాసికిరి రొవ్వొచ్చు సెయ్యె చెరసాలరె రొల్లబెల్లె సంగమురె రొల్లలింకు పాలు క్రుతజ్ఞత కొయివురో 4:10-19 ఇంకా చెరసాలరె రొల్లా పరిస్తితి రొవురో తిమోతి ఇంకా ఎప్రప్రదీతు సంగముకు పరిచయం కొరువురో 2:19-30 ఇంకా తంకు స్వాగతించికిరి తంకె నాయకత్వం అంగీకరించిలపన రాసికిరి అచ్చి.

సంగతీనె

1. పాలు పిలిప్పీ సంగముకు సుబం బులి కొయికిరి లేకకు రాసిసి 1:1-2
2. పాలు తా పరిస్తితి ఇంకా కుండె ఇబ్బంది లొగిల వినయొనె గురించి కొయివురో 1:3-2:30
3. సెయ్యె క్రైస్తవ జీవితం గురించి ఆచరించిల వినయం బడే నూచనలు దివురో 3:1-4:9
4. పాలు పిలిప్పీ సంగం కొరిల సహాయం గురించి క్రుతజ్ఞత కొయివురో ఇంకా సుబం బులి కొయికిరి ముగించివురో 4:10-23

1 యేసుక్రీస్తుకు దాసులైలా పాలు, తిమోతి పిలిప్పు పట్టనంరె క్రీస్తు యేసుకు చెందిలా పరిసుద్దులు సొబ్బిలింకు సంగరొ బొడిలింకూ పరిచారకులూనెకు సుబం కొయికిరి రాసిలా సంగతులూనె.

2 అం బో ఈలా పురువు తీకిరి ప్రబువైలా యేసు క్రీస్తు తీకిరి తొముకు క్రుప, సాంతి కలిగిమాసి.

దండము ఇంకా ప్రార్థన

3 మియ్యి తొముకు కెబ్బుకూ జ్ఞాపకం దన్నెగిన్నన్నా పురువుకు కృతజ్ఞత కొయిగిల్లించి.

4 మీ తొం కోసం ప్రార్థించిలా ప్రతీసారి సడ ఆనందంసంగరె ప్రార్థన కొరిలించి.

5 క్షేంకిబుల్నే సువార్త పైటి వినయంరె అగరె దినె తీకిరి ఉంచినె దాకా తొమె కొరిలా సహాయముకు దండము.

6 తొం బిత్తరె యే బొట్ట పైటి మొదలు కొరిలాట పురువాక. సడ యేసు క్రీస్తు బుల్లికిరి అయిల దినో వరకూ సే పైటి కొనసాగించికిరి పూర్తి కొరిపారొ బులి మో గట్టి నమ్మకం.

7 తొం గురించి మీ యాకిరి బావించువురొ న్యాయమాక. క్షేంకిబుల్నే తొమె మో మనుసురె అచ్చొ. మీ క్షేదురె తల్లాబెల్లె, మీ సువార్త తరుపురె వాదించుకుంటా సడకు నిరూపించితల్లాబెల్లె తొమల్లా యే క్రుపరె మో సంగరంకా పాలిబాగంలింకైకిరచ్చొ.

8 క్రీస్తు యేసురొ ప్రేమతీకిరి తొం కోసం మీ కెత్తె ఆపేక్కు కలిక్కిరచ్చొ పురువాక మెత్తె సాక్సీ.

9 తొం ప్రేమ జ్ఞానం సంగరె సంపూర్ణమైలా వివేచనసంగరె ఇంకా, ఇంకా వ్రద్ది చెందికుంటా తమ్మాసిబులి మీ ప్రార్థించిలించి.

10 సే విదంగా తొమె కెడ బొట్టో బచ్చిగిల్లబెల్లె క్రీస్తు అయిల దినొరె తొమె సొబ్బి విడుల నిర్దోసం నీలవన తప్పు నీలవన తమ్మాసి.

11 సడాకనీ పురువుకు మహిమ, స్తుతి కలిగిలాపని, తొమె యేసు క్రీస్తు ద్వారా కలిగిలా నీతి పలాలు సంగరె తొమె జీవితాలురె పరిపూర్ణముగా పూరికిరి తమ్మాసి.

క్రీస్తురె జీవురొ

12 అన్నబయినె అప్పుబొయినినె, మెత్తె సంబవించితల్ల సువార్త పైటి బడేవిస్తరించితాక బులి తొమె తెలిసిగిమాసి బులిగిల్లించి.

13 క్యాకిరిబుల్సే, మో బందానె క్రీస్తు కోసమాక కలిగినె బులి రొజాబవనం సొబ్బి స్థలాలురె తల్లా బతులుకు, సొబ్బిలింకు తెలుసు.

14 సెత్తాకనీ, ప్రబువు బిత్తరె రొల్లా అన్నబయినెరె అప్పుబొయినినెరె బడేలింకె మో బందకానె దీకిరి స్థిరమైలా విస్వాసం కలిక్కిరి, ఊరొసికుంటా పురువురొ వాక్కు ప్రకటించితె బడే దైర్యం దన్నెగిచ్చె.

15 ఈనె కుండెలింకె అసూయసంగరె కలహబుద్ధిసంగరె, ప్రకటించిలీసె ఈనె కుండె మంది బొల్లబుద్ధిసంగరె బోదించిలీసె.

16 ప్రేమసంగరె క్రీస్తుకు ప్రకటించిలాలింకు మియ్యి సువార్త తరువురె వాదించితందుకు నియమించిబొడించిబులి తంకు అరక.

17 ఈనె తల్లలింకె బందకాలై రొల్లా మెత్తె ఇంకా బడే బాద కలిగించిమాసి బులి సుద్ద మనుసుసంగరె నీకుంటా కక్ససంగరె క్రీస్తుకు ప్రకటించిలీసె.

18 ఈనన్నా పర్వానీ. కపటం సంగరె ఈనన్నా సత్యం సంగరె ఈనన్నా, క్యాకిరైనా క్రీస్తుకు ప్రకటించువురొ మాత్రం జరిగిలీసి. సడకు మియి సంతోసించిలింకి. ఇంకా అగురుకు కూడ సంతోసించిమి.

19 తొ ప్రార్థనానై వల్లరె, యేసు క్రీస్తు ఆత్మ సాయం వల్లరె మో యిడుదల కోసం యెడల్లా జరిగిలీసి బులి మెత్తె తెలుసు.

20 మియ్యి కే వినయంరైనన్నా లజ్జొపాలైసిబులి మెత్తె సంపూర్తిగా నిరీక్సన ఆసాబావం అచ్చి. ఈనె, సెత్తెలె పనికొక ఉంచినంకా మియ్యి జీక సంగరన్నా, మొరొవల్లరన్నా మో దే సంగరల్లా క్రీస్తుకు గనపర్చితల్లందుకు మెత్తె బడే దైర్యం అచ్చి.

21 మో మట్టుకైనే జీవురొ క్రీస్తాక, ఈనె మొరువురొ ఈనెనూ లబోఆక.

22 ఈనన్నా దే సంగరె జీవించుకుంట మో ప్రయాసకు పలితం తన్నే, సెత్తెలె మీ కిడ కోరిగీవాసో మెత్తె తెలుసువురొనీ.

23 యే దీట మొజిరె మీ ఇరుకురె పొడిజేంచి. మీ లొకొకు సడికిరి క్రీస్తుసంగరె రొయిజిమ్మాసిబులి మో ఆన. సొబ్బిటికన్నా సడాక మెత్తె మేల్తెలాట.

24 ఈనె మియ్యి దే సంగరె రొప్పురొ తొ కోసం బడే అవసరం.

25 సడ ద్వారా, తొమె విస్వాసంరె అబిన్నద్ది అనందం పొందితందుకు మీ జీకిరి తన్నే తొ సొబ్బిలింకు సంగరె మిసికిరితాంచి బులి మెత్తె తెలుసు.

26 ఈనె మియ్యి తొ పక్కు బుల్లికిరి అయివురోవల్ల మో ద్వారా క్రీస్తు యేసురె తొమె గర్వింపితె కారనమైకిరి అచ్చి.

27 మియ్యి తొముకు దిగితె అయినన్నా, నా అయినార్నన్నా, సొబ్బిలింకె మిసికిరి సువార్త విస్వాసం ద్వారా పోరాడుకుంటా, గుట్టాకబావం సంగరె టారికిరి అచ్చెబులి తొమె క్రీస్తు సువార్తకు తగిలాపనికిరి సలిగిత్తండి మియ్యి సునిలాపనికిరి యెడ బడే ముక్కము.

28 తొమె సత్తువనెకు డొరితెనాండి. తొమె ధైర్యంగా రోండి తంకు అవజయం, తొముకు రక్తన కలిగివోబులి తంకు జనిలా సూచన. యెడ పురువు వల్లరె కలిగిలా విజయమాక.

29 ఈనె తొమె క్రీస్తుకు విస్వసించిలాలింకాకనీ తా కోసం కొన్ణానె అనుబించితె, సేవించితె, అవకాసమంకా దీసి.

30 *అడకగరె మీ పోరాడిలా పోరాటంకు దిగిసా. సడగురించి సునిలించి. తొమ్మంకా సడాక పోరాటంరె పాలిబాగస్తలు యీపారొ.

2

క్రీస్తురొ గొప్పతనం ఇంకా తగ్గింపు

1 ఈనె తొ జీవితాలై హెచ్చరించువురొ యీనెనూ ప్రొత్సాహం ఈనన్నా, ప్రేమదీకిరి కెటువంటి ఆదరన ఈనన్నా, పురువురొ ఆత్మ సంగరె కెటువంటి సహవాసం ఈనన్నా, దయ దిగిపించువురొ, ఆదరించువురొ ఈనన్నా తన్నే సడ క్రీస్తాక తొముకు బలపర్చిలీసి,

* 1:30 అపో. కా 16, 19-40

2 తొమల్లా గుట్టాక మనుసు, గుట్టాక రకమైలా ప్రేమ, ఆత్మరె
ఏకత్వం, గుట్టాక ఉద్దేశం కలిగితైకిరి మొ అనందముకు సంపూర్ణం
కొరండి బులి తొ దీకిరి కోరిలించి.

3 కక్స సంగరైనా, స్వార్థం సంగరైనా కిచ్చి కొరితెనా. వినయమైలా
మనుసు సంగరె జొనుకు జొనె తొముకన్నా పొదరె గొప్పలింకెబులి
బచ్చిగిత్తండి.

4 తొ బిత్తరె ప్రతీమనమ తా సొంతపైటీనాక నీకుంటా పొదర్లింకెరొ
అవసరాలంకా దిగిమాసి.

5 క్రీస్తు యేసుకు తల్లా యే మనుసు తొమ్మంకా కలిక్కిరి తమ్మాసి.

6 నయ్యె పురువురొ స్వరూపం కలిగిలాట.

పురువు సంగరె సమానంగా తైతే సడదిగిన్నాసిబులి
బులిగిల్లాని.

7 సడ బదులుగా, మనమ రూపంరె జొరైకిరి,

దానుడురొ రూపం దరించిగీకిరి తాకు సెయ్యాక సొబ్బిటికి
సడదిపీసి.

8 సెయ్యె ఆకారంరె మనమగా దిగదీకిరి మొర్నొదాక,

బుల్నే సిలువ మొర్నొకంకా సెయ్యె విదేయత సంగరె సలికిరి
తాకు సెయ్యాక లోబొడిసి.

9 యే కారనం దీకిరి పురువు సొబ్బిటికన్నా

సొబ్బి నానె కన్నా గొప్పగా హెచ్చించిసి.

10 సడుకాక పరలోకంరె,

బూమంపరె, * బూమి తొల్లె తల్లా ప్రతీ జొన్నె

ముడుకూనె యేసు నారె మొగిలాపనికిరి కొరిసి,

11 ప్రతీ జొన్నె జిబ్బో బో ఈలా పురువురొ మహిమ కోసం

యేసు క్రీస్తుకు ప్రబువుగా ఒప్పిగివ్వె.

లోకంరె బొత్తినె పనికిరి రొమ్మాసి

* 2:10 బుమి తొల్లె రొల్లె మెదరొ రొల్లె రాజ్యం మొర్నిజిల్లలింకె రొనె బులి కొయితానె

12 ఈనె మో ప్రియమైలాలింకె, తొమె కెబ్బుకూ లోబొడితల్లాపనాక, మీ తొం పక్కరె తల్లాబెల్లాకనీ, నీలాబెల్లంకా, డొరొ సంగరె వొనుకు సంగరె తొం సంపూర్ణమైల రక్కన కోసం కొనసాగించండి.

13 కైంకిబుల్నే తాకు ఇష్టమైలాట తొమె కొరితె, తొం బిత్తరె కెబ్బుకు పైటి కొరిలాట పురువాక.

14 తొమె కొరిలాంచల్లా, నాగల్లిగికుంట, నా సొనిగికుంట కొరండి.

15 సడవల్లరె తొమె మూర్కుల్లెలా చెడ్డ మనమానె మొజిరె దోసము నీలలింకెగా, నిందనీకుంటా, నిస్కలంకులైకిరి పురువురొ పొనెగా జివవాక్కుకు గట్టిగా దరిగిండి. లోకంరె తల్లాలింకె మొజిరె మెగోన్రో చుక్కలు పనికిరి హల్లోగా రొమ్మాసి.

16 తొమె సాకిరి కొరిలాబెల్లె క్రీస్తు బుల్లికిరి అయిలా దినుకు మియ్యి సుచ్చరాక కొస్తాపొడిలానీ బుల్లికిరి మో పైటి వుదా అయిలానీబులి మెత్తె జనుంచి. సడవలరె గొప్పగా కొయిగిత్తె మెత్తె గుటె కారనం తానీ.

17 ఈనె తొం విస్వాసయాగంరె సడకు సంబందమైలా సేవరె మో పొర్నొ దారబోసినన్నా, † మీ ఆనందించికిరి తొం సంగరల్లా సంతోసించిమి.

18 సాకిరాక తొమ్మంకా ఆనందించికిరి మో సంగరె సంతోసించండి.

తిమోతి ఇంకా ఎవప్రాదితు

19 తొం గురించి వార్త సునికిరి మెత్తె ప్రోత్సాహం కలిగిలాపనికిరి, ప్రబు చిత్తమైనె బేగా తిమోతికు తొం పక్కు పొడదిమ్మాసి బులిగిల్లించి.

20 తిమోతి పనికిరి తొం గురించి పట్టించిగిల్లాట ఇంకా మో మనస్సుకు పంచిగిత్తె కేసే నింతె.

21 సొబ్బిలింకె తంకె సొంతపైటినాక దిగిల్లీసేగని, యేసు క్రీస్తు పైటినె దిగిల్లీనింతె.

22 తిమోతి తాకు సెయ్యాక రుజువు కొరిగిచ్చి. క్యాకిరిబుల్నే, బోకు పో క్యాకిరి సేవ కొరివొయో సాకిరాక సెయ్యె మో సంగరె సువార్తపైటిరె సేవ కొరిసి బులి తొముకు తెలుసు.

† 2:17 తొం కోసం మొర్నిజన్నసు

23 సడకాక మెత్తె కిడ సంబవించిలీసా తెలిసిలా వెంటరాక తాకు పొడదిమ్మాసి బులిగిల్లించి.

24 మియ్యి బేగా ఆంచిబులి ప్రబువుద్వారా నమ్మిలించి.

25 మో బయి, మో సంగరె జతపైటితా, మో సంగరె సమానంగా పొరాడిలాట, తొం ప్రతినిది, మెత్తె అవసరమైలాబెల్లె సేవకొరిలాట యీలా ఎవప్రాదితుకు తొం పక్కు పొడదీతె అవసరం బులిగించి.

26 సెయ్యె జబ్బు పొడిసిబులి తొమె సునిసా, గనక సెయ్యె తొముకు సొబ్బిలింకు దిగిమాసిబులి బడే బెంగదీగిచ్చి.

27 సొత్తాక సెయ్యె జబ్బెకిరి మొర్నుకు పక్కరచ్చి ఈనె పురువు తాకు కనికరంచిసి. తాకాకనీ, దుక్కమంపరె దుక్కం నాయినూ మో ఉంపరంకా కనికరించిసి.

28 ఈనె తొమె తాకు ఇంకా దిక్కిరి సంతోసించిలాపనికిరి, మో చింత తీరిమాసిబులి తాకు బేగా పొడదిల్లించి.

29 తాకు పూర్నానందం సంగరె ప్రబువు నారె మిసుగునొండి. సాలింకు గౌరంగా దిగొండి.

30 కైంకిబుల్నే సెయ్యె క్రీస్తు పైటిరె బడేమట్టుకు మొర్నొకంకా సిద్దమైసి. మెత్తె సేవ కొరితె తొమె నాతీర్చినార్లా మో అవసరాలు తొం బదులు తీర్చితె, సెయ్యె తా పొర్నొకంకా లెక్కకొరిలాని.

3

సొత్తాయిలా నీతి

1 ఆకరుగా, మో అన్నబయినె అప్పు బొయినీనే, ప్రబువురె ఆనందించొండి. యే సంగతీనాక తొముకింకా రాసివురొ మెత్తె సమస్య కిచ్చినియ్యి. నడ తొముకు క్షేమమాక.

2 దుష్టులైలాలింకు పైటిసుకు జాగర్తగా తమ్మాసి. కుక్కురొనెపనాలింకోసం జాగర్త. తంకె తంకరొ ఆచారాలసంగరె చీరిపీలాలింకె గురించి జాగర్తగా తమ్మాసి.

3 కైంకిబుల్నే, దే అంపరె ఆచారమూనె నమ్మకం నాదీగీకుంటా పురుపురొ ఆత్మసంగరె ఆరాదించుకుంటా, క్రీస్తు యేసురె అతినయించుతల్లా అమ్మాక అసలైలా సున్నతి పొందిలాలింకె.

4 సాకిరియిలపని ఈనె, మియ్యి దేకు ఆదారం కొరిగీపారి. కేసైనా దే కు ఆదారం కొరిగీమాసి బులిగిన్నే, మియ్యి తంకన్నా బూతు కొరిగీపారి.

5 మియ్యి అట్టదినొరె సున్నతి పొందిగించి. ఇస్త్రాయేలుగా జొర్నైంచి. బెన్యామీను గోత్రముకు చెందిలాట. హెబ్రీ సంతానమురె జొర్నైలా హెబ్రీట. దర్మసాస్త్రం పాటించిలా వినయంరె పరిసయ్యుడుగా అచ్చి.

6 ఆసక్తి వినయంరె సంగముకు హింసించితే దర్మసాస్త్ర నీతి వినయంరె తప్పునీకుంటా సంపూర్ణవిదేయత సంగరె పాటించించి.

7 ఈసన్నా కిరకిర మెత్తె లవోగా అచ్చెవో సడానుకల్లా క్రీస్తు గురించి నాపైటికైలాంచ బులిగించి.

8 సడ మాత్రం నీ మో ప్రబువైలా యేసు క్రీస్తుకు జనివురాక బడే బొల్ల సంగతి. సడకాక మరి నిచ్చయముగా మో ప్రబువైలా యేసుక్రీస్తురొ బడేవిలువైలా జ్ఞానం కోసం సొబ్బిటికూ నొన్డాగా బచ్చిగిల్లించి. తా కోసం సొబ్బిటికూ ఇష్టపూరకంగా తిరస్కరించింది. క్రీస్తుకు మాత్రమాక సంపాదించిగితే, సడానుకు చెత్త సంగరె సమానంగా బచ్చిగించి.

9 దర్మసాస్త్రంకు సంబందించిలా మో స్వనీతి నీకిరి, క్రీస్తుబిత్తరె విస్వాసము సంగరొ నీతి, బుల్నే విస్వాసం ద్వారా పురుపు అనుగ్రహించిలా నీతికలిగిలాటైకిరి తాబిత్తరె దిగదిమ్మాసి బులి కొరించి.

10 క్యాకిరైనా, తా మొర్నో వినయంరె సమానఅనుబవం కలిగిలాటైకిరి, తాకు తా పునరుత్థానం బలముకు తెలిసిగిత్తందుకు, తా ప్రమానెరె పాలుపొందితందుకు.

11 మెత్తె మీయాక మొర్నొటికిరి ఉటికిరి జీకిరి అచ్చిబులి నిరీక్సనరె అచ్చి.

గమ్యం ఆడుకు దొముడువురొ

12 యెడానుకల్లా మీ యింకా పొందిగిల్లాని గనక మీ యింకా సంపూర్ణుడైలాని. క్రీస్తు మెత్తె కిడకోసం దరిగిచ్చో సడకు మీ సొంతం కొరిగిమ్మాసే బులి ప్రయత్నం కొరుకుంటా అచ్చి.

13 ఈనెను అన్నబయినె అప్పబొయినినె, సడకు మియ్యి ఉంచునాక సాదించించి బులి బులిగిల్లాని. ఈనె గుట మాత్రం కొరిలించి. అడకగరె జరిగిలాంచ పసిరిజేకిరి, అగురుకు తల్లాంచ పొందితె కోసం బడేప్రయాస పొడిలించి.

14 సడకు క్రీస్తు యేసురె పురువురొ డక్కకు సంబందించిలా పరలోకబహుమతి పొందితె కోసం గురి పక్కాక దొమిడిలించి.

15 ఈనె అంబిత్తరె ఆత్మరె సంపూర్ణమైలాలింకల్లా యాకిరాక ఆలోసించిమాసిబులి ప్రోత్సహించిలించి. మరి కే వినయం గురించైనా, తొమె ఇంగుట పనికిరి ఆలోసించినె సడకంకా పురువు తొముకు బయలు పరిచివొ.

16 ఈనన్నా ఉంచినెజాంక అముకు మిల్లా నియమాలు దరికిరాక క్రమముగా సలిగిమ్మా.

17 అన్నబయినె అప్పబొయినినె, తొమె మెత్తె పోలికిరి సలుగునోడి. అమె తొముకు మాదిరిగా తల్లా ప్రకారం సలిగిల్లాలింకు తంకు ఎంబడించోడి.

18 బడేలింకె క్రీస్తు సిలువకు మొర్నొకు సత్తువూనెగా సలిగిల్లినె. యెడానె గురించి తొముకు బడేసార్లు కొయికిరి, ఉంచినంకా కందికుంటా కొయిలించి.

19 నరకమాక తంకు అంతం. తంకు దేఆసలాక తంకు పురువు. తంకె తంకె లజ్జోపొడివలిసిలా సంగతినె గురించి గొప్పగా కొయిగిల్లినె. బూ సంబందమైలా సంగతినంపరె మనస్సు దీగిల్లినె.

20 అమె పరలోకపౌరులునె. అం రక్కకుడైలా యేసు క్రీస్తు ప్రబువు సెట్టెటికిరాక ఆసిబులి తా కోసం ఎదురు దిగిలించొ.

21 సొబ్బిటుకు తా అదికారం తొల్లె లోపరిచిగిత్తల్లా తా సక్తి సంగరె అం బలహీనమైలా దేనుకంకా తా మహిమ దేనెగా మార్చుసి.

4

సూచనలు

¹ సడుకాక మో ప్రియమైలా అన్నబయినె అప్పబొయినీనె, తొంబుల్నే మెత్తె బడే ఇన్ఱం. తొముకు దిగిమాసిబులి మెత్తె బడే ఆసగా అచ్చి. మో ఆనందం మో కిరీటమైకిరి తల్లా మో ప్రియస్నేహితులూనే ప్రబువురె స్తిరమైకిరి తమ్మాసి.

² ప్రబువురె గుట్టాక మనుసు సంగరె మిసికిరి తమ్మాసి బులి యువోదియకు, సుంటుకే సోదరినెకు బతిమాలిగిల్లించి.

³ వై, సొత్తయిల సహకారీ, తొత్తంకా పొచ్చర్లించి. సే మొట్టానె క్లెమెంతో సంగరంకా, మిగిల్లా మో సహకారీనె సంగరె సువార్త పైటిరె మో సంగరె ప్రయాసపొడిసె గనక, తంకు సహాయం కొరుబులి కోరిలించి. తంకునానె జీవగ్రందంరె రాసికిరచ్చె.

⁴ సొబ్బిబెల్లె ప్రబువురె ఆనందించొడి. ఇంకా కొయిలించి, ఆనందించొడి.

⁵ ప్రబువు బేగా అయిలీసి. తొం మ్రుదుమైలా ప్రవర్తన సొబ్బిలింకూ తెలియవర్చొండి.

⁶ కేటగురించి చింత పొడితెనాండి ఈనె సొబ్బి విసయానెరె ప్రార్థనా విజ్ఞాపనానె సంగరె క్రుతజ్ఞతా పూరకంగా తొం విన్నపానె పురువుకు మగొండి.

⁷ సెత్తెలె సొబ్బిజ్ఞానముకు మించిలా పురువురొ సాంతి, యేసు క్రీస్తురె తొం మనుసూనుకు తొం ఆలోచనానెకు జొగులొ తాసి.

⁸ చివరకు, అన్నబయినె అప్పబొయినీనె, కే యోగ్యతన్నా, మెప్పున్నా తన్నామాను, కేట సత్యమైలాంచో, కేట గౌరవమైలాంచో, కేట న్యాయమైలాంచో, కేట పవిత్రమైలాంచో, కేట రమ్యమైలాంచో, కేట బొల్ల నా కలిగిలాంచో, నడంపరె మనుసు లొగొండి.

⁹ ఈనె మో కొతానె వల్లరె పైటినె వల్లరె తొమె కిడ సుక్కిగీకిరి అంగీకరంచినెవో, మో బిత్తరె తల్లాపనికిరి కేట సునిసేవో, కేట దిగినెవో, నడానుకు కొరండి .సెత్తెలె సాంతికర్తయైలా పురువు తొముకు తొడైకిరి తాసి.

బహుమతి కోసం దండము కొయివురో

10 మో గురించి తోమె ఉంచినెకైనన్నా ఇంకా ఆలోసించిలీసాబులి ప్రబువురె బడే సంతోసించించి. అడకగరె తోమె మో గురించి ఆలోసించిసా గని తొముకు సరైలా సమయం మిల్లాని.

11 మెత్తె తక్కువైసిబులి మి యాకిరి కొయిలానియ్యి. మీ కే పరిస్థితిరె తన్నాన్నాసరాక, సే పరిస్థితిరె సంత్రుప్తి కలిక్కిరి తవ్వ్వరో సుగ్గించి.

12 దీనస్థితిరె తవ్వ్వరో తెలుసు, సంపన్న స్థితిరె తవ్వ్వరో తెలుసు. ప్రతీ వినయంరె సాబ్బి పరిస్థితిరె పెట్టో పూరికిరి తవ్వ్వరో, బొక్కొసంగరె తైతందుకు, సముద్ధి కలిక్కిరితైతె, కిచ్చీనీకుంటా లేమిరె తవ్వ్వరో సుగ్గించి.

13 మెత్తె బలపరిచిలా క్రీస్తు వల్లరాక మీ సాబ్బి కొరిపారిలించి.

14 ఈనన్నామో కొన్టొనెరె పాలుబంటిగివురో తోమె బొట్టపైటి కొరిసా.

15 పిలిప్పీలింకే, మియ్యి సువార్తకు బోదించువురో మొదలుదీకిరి మాసిదోనియ తీకిరి బయలుదేరిలాబెల్లె తొం సంగం గుట్టాక మెత్తె సహాయం కొరికిరి ఆదిగిచ్చి. యేసంగతి తొముకల్లా తెలుసు.

16 కైంకిబుల్నే తెస్సలోనీకరంకా తోమె బడేసార్లు మో అవసరం తీర్చితె సాయం కొరిసా.

17 మీ బహుమానంకు ఆసించికిరి యాకిరి కొయివురోనీ, తొముకు ప్రతిపలం బడేట మిలిమాసిబులి ఆసించికిరి కొయిలించి.

18 మెత్తె సాబ్బి సారిపొడిలెత్తచ్చి. తోమె పొడదిల్లా సారొకోనె ఎపప్రాదితు సంగరె అందిసె. మెత్తె లోటు కిచ్చీనీ. నడానె ఇంపైలా సువాసనగా, పురువుకు ఇష్టమైలా అర్పనగా అచ్చె.

19 ఈనె మో పురువు తా ఐస్వర్యం సంగరె క్రీస్తు యేసు మహిమరె తొం సాబ్బి అవసరాలుకల్లా తీర్చునీ.

20 అం బో ఈలా పురువుకు కెబ్బుకూ మహిమ కలిగిమాసి గాక. ఆమెను.

ఆకరు దండము

²¹ పురువురొ ప్రజానెకల్లా క్రీస్తు యేసురె దండము కోండి. మో సంగరె తల్లా అన్నబయినె అప్పబొయినినల్లా తొముకు దండము కొయిలీసె.

²² ఎట్టె తల్లా పురువురొ ప్రజానెల్లా ముక్కంగా రొజా గొరె తల్లా తొముకు అబివంధనము కొయిలీసె.

²³ ప్రబువైలా యేసుక్రీస్తు క్రుప తొ సొబ్బిలింకె సంగరె తమ్మాసి గాక.

సాత్త్వ పురుషురొ పవిత్రొ కొత
The Holy Bible in the Reli language of India: సాత్త్వ
పురుషురొ పవిత్రొ కొత (Bible)

copyright © 2023 The Word for the World International and Relli Translation Samiti, Vishagapatnam, Andra Pradesh

Language: Relli (Reli)

Contributor: The Word for the World South Asia

సాత్త్వ పురుషురొ పవిత్రొ కొత
నో నిబంధన, 2023

The New Testament in Relli Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-06-26

PDF generated using Haiola and XeLaTeX on 26 Jun 2025 from source files dated 26 Jun 2025

46416fd4-e5d1-555f-9e24-8bbc94e50bd9